

ԱՐԻՒՆԱԼԻ ՄԱՐՏԵՐ ՀԻՒՍԻՍ ԱՐԵՒԵԼԵԱՆ ՇՐՋԱՆՈՒՄ

ՆՈՅԵՄԲԵՐԵԱՆ, 4 ՄԱՅԻՍԻ, Մ.Տ.Կ.,...

Նոյեմբերեանի շրջանի Ոսկեպար գիւղում գնում են արիւնալի մարտեր: Կան բազմաթիւ վիրաւորներ: Զինսարքաւորումները չեն բաւականացնում: Ոսկեպար գիւղում մարտնչում են Նժդէհ-ԱԻՄ միացեալ զունդը եւ Զօրավար Անդրանիկ ջոկատը:

Ընդհարումները հիմնականում տեղի են ունենում ԽՍՀՄ զինուած ուժերի հետ, որոնք «եղբայրաբար» համագործակցում են ադրբեջանական ՕՄՕՆականների հետ: Յարձակումները տեղի են ունենում միաժամանակ եւ բարձունքներից՝ տանկերով ու հեռահար հրանօթներով, եւ օդից՝ ուղղաթիռների միջոցով:

Ոսկեպար գիւղում է գտնուում նաեւ բռնցքամարտիկ Սամսոն Խաչատրեանի զինուած ջոկատը:

Մարտեր են գնում նաեւ Բաղանիս-Ոսկեպար-Կօթի Շաւարշաւանի սահմանային տարածքով:

Երեկ մեր զինուած ջոկատների կողմից գնդակոծուել է ադրբեջանական Ասկիպարա գիւղը, որը դէմ յանդիման է հայկական Ոսկեպար գիւղին:

Տաուշի շրջանում նոյնպէս փոփոխաձգութիւն է: Տաուշի վաշտում կան երեք վիրաւորներ, որոնցից մէկը արկի հարուածից կորցրել է ոտը:

Մովսէս գիւղում արկի հարուածից զոհուել են երկու երեխայ՝ մէկը Մովսէս գիւղի բնակիչ, միւսը՝ Բերդ շրջկենտրոնից:

Մեր զինուած ջոկատները մեծ կարիք ունեն այնպիսի զինսարքաւորման, որոնցով կարելի լինի մարտնչել ուղղաթիռների դէմ, սակայն այս հրթիռների գործածութիւնը կարող է ապահովուել միայն կառավարական մակարդակով: